

國

朝

列

卿

紀

國朝列卿紀卷之三十九

禮部序

夫禮部尚書者非古制也自漢置尚書五曹以來其四爲客曹主外國夷狄事後漢光武分六曹吏曹主選舉兼掌齋祀魏尚書有祠部曹及晉江左特重祠部尚書掌廟祧之禮常與右僕射通職不常置以右僕射攝之宋齊梁陳皆號祠部尚書領祠部儀曹二曹後周置春官卿又有禮部而不言職事後改禮部爲宗伯又春官之屬有典命後改典命爲大司禮俄改大司禮爲禮部謂之禮部大夫至隋開皇三年定置禮部尚書統禮部祠部主客膳部四曹唐承隋制不改龍朔二年改爲司禮太常

伯咸亨元年復舊光宅元年又改爲春官龍朔元年復舊沿及
趙宋相因不改然皆爲尚書省屬官與周官太宗伯掌邦禮之
任固有間矣 國初沿唐宋之制設禮部尚書侍郎之職掌天
下禮儀祭祀宴享貢舉之政令仍屬中書省洪武十三年革中
書省陞六部每部分四子部各設郎中員外郎主事於是禮部
其屬有四曰儀部曰祠部曰膳部曰主客部二十九年改儀部
爲儀制祠部爲祠祭膳部爲清膳主客仍舊俱稱清吏司永爲
定制然成周宗伯之職則專主鬼神之神祀至合典樂典教內而
宗國外而裔夷上而天官下逮醫師膳夫伶人之屬靡不兼
自我 朝始也况罷丞相以後政歸六部而 國家稽古右文

敷典察倫類非博雅崇古道藝德行備具者莫稱茲任故成化
弘治以來率以翰林儒臣爲之迄由此登公孤任輔導使學未
明道而欲其秉持國是舉明主於三代之隆不亦難哉惟禮
部改置北京肇自永樂辛丑若夏原吉以七年兼行在禮部事
趙珰以七年扈行在然大政出於留都故不敘云今詳各官年
表於後其行實見於事紀其勲德茂著者表爲列傳

國朝列卿紀卷之三十九

國初禮部尚書年表

崔亮

北直藁城人故元省掾
洪武元年任本年丁憂

錢用任

直隸廣德人故元編修
洪武元年任本年致仕

陶凱

浙江臨海人國初
徵聘洪武三年任

楊訓文

四川潼川人儒士洪武
四年任本年改戶部

牛諒

山東東平人秀
才洪武五年任

劉昭先

人舉人才
洪武六年任七年罷

呂本

南直壽州人故元
都事洪武七年任

張善

人
洪武八年任

張 籌

南直無錫人故元浙
江解元洪武九年任

朱夢炎

江西進賢人故元進士洪
武十一年任十三年卒

鄭九成

人洪武
十三年任本年免

僕 斯

應天溧陽人故元知州洪
武十三年任本年致仕

李 冕

人洪武
十三年任次年免

李叔正

江西靖安人洪武初薦
舉十四年任十五年卒

高 信

浙江義烏人歲貢洪武
十五年任本年致仕

劉仲質

江西分宜人薦舉
洪武十五年任

任 昂

河南河陰人故元進
士洪武十五年任

趙 瑁

河南宜陽人儒士洪
武十七年任改吏部

唐鐸

南直虹縣人元末從龍洪武十九年任

李原名

北直安州人洪武中舉儒士二十年任二十三年致仕

趙勉

湖廣夷陵人進士洪武二十四年任改戶部

楊靖

南直山陽人進士洪武二十六年任歷左都

任亨泰

湖廣襄陽人狀元洪武二十七年任

門克新

陝西秦州人洪武二十九年任本年卒

鄭沂

浙江浦江人洪武三十年任三十一年致仕

陳迪

南直宣城人洪武中徵辟三十一年任

李至剛

南直華亭人洪武中舉明經三十五年任

鄭賜

福建鳳寧人洪武乙丑進士永樂三年任六年卒

趙

羽

江河南祥符人太學生
永樂五年任政刑部

劉

觀

北直維縣人進士永樂六
年任本年改刑部左掾

國初禮部尚書行實

崔亮字執夫直隸真定府藁城縣人故元浙江省掾丙午年王師至舊館來附授中書禮曹主事遷濟南知府撫綏得宜士民感服洪武元年陞禮部尚書本年以母憂去官本年冬起復爲禮部尚書癸未詔定官員親屬冠服之禮亮於內外官員父兄伯叔子孫弟姪及隸卒軍士等制各定有差三年上諭亮曰司天臺言朔日以來日有黑子占者多以爲祭天不順禮所致令亮制之亮引用漢唐宋及元損益不同復以我國朝前議園丘從祀之禮以漢唐爲煩故正祀日月星辰太歲爲簡當上然之復問郊祀天地拜位皆正中而百官朝參則列東西避正

中何也亮對以天子祭天升自午陛祭社升自子陛蓋社主陰
陰北方也故君南向答陰之義也郊主陽陽南方也故君北向
以答陽也若羣臣朝參無答神之義俱當避君上之尊故升降
則皆由卯陛朝班則分列東西以避馳道此其義不同 上由
是益重亮因命百司朝參左右班不得越三尺省府臺公俱就
甬道拜上復承命議百官及內史監官於 皇太子親王前稱
殿下自稱名若本官內史本府官及承奉司於 皇太子親王
前俱稱殿下自稱臣百官在 上前稱 皇太子稱親王曰某
王又定大朝會常朝及內外官員辭謝奏事侍班等禮付侍儀
司行之并定 皇太子及羣臣賜坐殿上坐墩墩制參酌宋典

爲各等差其他請旗纛止祭於當祭之月與夫宗廟四時之祭皆用四時孟月及歲除凡五祭於清明等節各備時物薦享俱允行之五月奉命定大射禮餼頒於官府學校時禮儀草創而亮引証考據多本經典云七月卒於官

餘冬錄云洪武三年禮部尚書崔亮請定仁祖陵號旣得又請下太常行祭告禮太常博士孫吾與奏以爲山陵之制莫備於漢凡人主卽位之明年將作郎管地以天下貢賦三分之一入山陵如漢文帝起霸陵欲以此山石爲椁時文帝尚在尊位豈有陵號祭告之禮乎又唐太宗昭陵之號定於葬長孫皇后時武后合葬乾陵其號定於高宗陵葬之日其時帝后之陵初

未有兩號其於祭告之禮決無有也蓋廟號與陵號不同廟號是爲大行之號不祭告不可故必上冊諡以告之神明若陵之有號則后嗣之王所以識別先陵而已故歷代皆不以告今英陵加號亮欲行祭告臣竊以非宜亮曰加以陵號歸崇先世考之典禮如漢光武加上先陵曰昌宋太宗加上高祖陵曰欽曾祖陵曰定考陵曰安蓋創業之君尊其祖考則亦尊崇其陵既尊其陵亦必以告禮緣人情加先帝陵號而不以告先帝者非人情也臣以爲告之是於是廷議皆是亮遂命俟陵碑石成遣太常行祭告禮

錢用任字

直隸廣德州人故元進士爲翰林院編修張士

誠據吳用爲淮南省叅政乙巳年王師下淮揚率城歸附授按察司副使尋遷中書省叅議吳元年改御史臺經歷進奉訓大夫尋奉命裁定律令洪武元年陞禮部尚書秋八月遣官釋奠於先師孔子用任等奏周制凡始立學者釋奠於先聖先師凡學春夏釋奠於先師秋冬亦如之漢儒以先聖爲公若先師孔子爲詩書之官若禮有高唐生樂有制氏詩有毛公書有伏生可以爲師者蓋四時之學將習其道故釋奠各以其師而不及先聖惟春秋合樂則天子視學有司總祭先聖先師是則漢時釋奠亦略可知矣魏正始中使太常釋奠於辟廱晉釋奠皆於國學東晉成穆孝武皆親釋奠隋制國子監每歲四仲月上丁

釋奠先聖先師州縣學則用春秋仲月唐初釋奠儒官爲祭主
直書博士姓名敢昭告於先聖許敬宗奏請令國子監祭酒爲
初獻詞稱皇帝謹遣仍令司業爲亞獻博士爲終獻縣則令爲
初獻丞爲亞獻主簿及尉通爲終獻永爲禮部武德貞觀中皆
以二月親幸國子監釋奠開耀景龍中皆皇太子釋奠於太學
開元中詔春秋釋奠以三公攝事著之常式若遇大祀則仲丁
州縣用上丁宋元因古禮而損益之今宜定制以仲春仲秋二
上丁日降香遣官祀於國學以丞相初獻翰林學士亞獻國子
監祭酒終獻上然之至是遣官致祭本年十二月乞休賜居

湖州

陶凱字中立號耐久浙江台州府臨海縣人生時有大星墜簷
前光輝臥室比成童讀書輒過目成誦爲文下筆動千百言皆
據理立論博學強記性遲重不妄言笑益重孝悌之道旣冠夜
歸限於大溪不能渡忽有人撐小舟舶岸卽攝衣登舟旣渡回
顧舟人皆無見者異之一日里人家大疫凱探視病者見妖神
入甕器中避之奉紙筆與封識命棄水中疫卽愈又嘗入城晚
宿三江病家夜禱俟祝者過夜分凱曰我代之迺朗誦離騷經
聲清越以長病者驚汗浹背而愈儀容步履有嚴有則四方士
弟慕其學相從者甚衆厥父敦孝友苦於不給以其束修之人
佐父治喪葬供祭祀如禮上世墓域有奪於勢家咸贖而表之

且他無兄弟惟一妹適仙居懷仁顧氏早卒其子及女撫以成人故鄉黨稱孝友者莫不曰陶氏父子而士大夫又皆爲詩以歌詠之誠意伯青田劉氏爲之記嘗遊吳興遇相者四明袁廷玉謂之曰公五岳朝挹而氣色未開五星分明而光澤未見宜藏器待時後十年爲異代臣子顯名其在荆揚間也至元中以明經掇科除永豐學諭內醜夷德不受職隱居教授主杭州施允弘家塾我太祖初起兵聞名訪凱延上座不敢居太祖曰師座不可坐耶凱曰將軍器宇軒昂襟懷豁達凱閱人誠見所未見者雖侍側且不可矧師位耶相與極談因進望空取天下之策太祖曰何謂也凱曰羣雄所據地是實地兵強未可

與敵胡元雖有地政衰民怨是空地也取之易也 太祖大奇之自後用其策遂至地廣兵強而興焉別間凱囑曰方今百姓愁苦仰在明主將軍請自愛民寶重 太祖曰會有重遇日子尚未晚也戊申歲 太祖定鼎金陵遂遣使奉書幣來徵時凱矢心不仕游學湖海中不應詔 上求之懇切諭來使曰陶凱不應詔可取一族人首級回話由是族人之四遠求得凱見上上曰卿何棄遺乃爾曩日錢塘之會已得卿之良策茲劉基宋濂累道卿名德宏材不可煩引翼耶二年補翰林編修與學士宋濂待制王禕儒士汪克寬胡翰陳基魯魯趙滂張文海徐尊生王禕傳恕王綺傳著謝徽高啟等分科修纂所撰元史三十八

卷志五十三卷傳六十二卷目錄二卷繕寫成一百二十冊又撰洪武廣韻若干卷以進 上稱善命敕大本堂授楚王經洪武三年陞禮部尚書剖符封功臣議五等封爵宿大本堂據歷代故實討論詳定四夷之未歸附草重書論之悉效順獻琛於時法制未備 上命有司各行鄉飲乃采周官儀禮及唐宋之制參定其儀又以兵亂之後人才荒落命定科舉式行於天下以取賢斂才焉開國之初百凡禮儀區畫爲多四年初設進士二月九日 上命嘉議大夫國子祭酒魏觀爲讀卷官凱之弟陶誼爲彌封官取中式進士吳伯宗等一百三十名而凱實提調之得人之盛始此遂刻程文而凱叙其首又命撰大明

九閔其略曰一曰本大初二曰仰大明三曰民初生四曰品物
亨五曰御六龍六曰太階平七曰君德成八曰聖道成九曰樂
清寧九月冊河南王保保女爲秦王嬪妃時妃有外王父喪

上命廷臣議之凱奏大功以下雖凡人亦可成嬀況王妃無服

上命中使及女史往諭妃家行納徵發冊禮五年六月癸卯旬容

縣民獻嘉瓜二同蒂而生中書省臣率百官以進乃奏頌且曰

陛下臨御同蒂之瓜產於旬容旬容陛下祖鄉也實爲禎祥蓋

由聖德和同國家協慶故雙瓜連蒂之瑞獨見於此以彰

陛下保民愛物之仁非偶然者上曰卿以此歸德於朕朕無德

不敢當冬十一月辛酉長至日上御奉天殿集羣工於庭告

以誓命戊午出宿齋居時工部尚書黃肅工部員外郎牛諒晉
府叅軍熊鼎磨勘司令吳雲兵部郎中劉崧工部主事周子諒
秘書監丞陶誼府錄事張孟堅吳府錄事吳從養侍凱請曰

皇帝升中於天國之大典幸際熙明與於執事之列不可無篇什
以紀慶成昭示萬世遂以唐詩星臨萬戶動月傍九霄多爲韻
凱首之有月朗送殘星之句上命翰林學士宋濂序諸首十

二月凱言漢唐宋皆有會要紀載時政以資稽考今起居注紀
言紀事藏之金櫃已呈爲實錄凡諸司領錄聖旨及奏事簿
籍紀載時政可以垂法後世者宜依會要編類爲書使後之議
事者有所考焉其臺省府宜各置銅櫃藏領錄簿以備稽考俱

從之 車駕由宣城至金華紀所歷奉制賦詩一十四首有主
師百萬過南州之句以進陪祀太廟扈駕還轡進賀以詩有起
看北斗正當天之句 上稱善一日召對文華殿賜繡頃間
上色愀請得 高后艱產之由因進以方晡時喜捷疊至 上大
悅賜之金牌篆云免陶卿之罪又嘗萬幾暇凱陪視便殿 上
從容問居地形勝凱以象鼻岩對且曰臣鄉人張竹屋題曰曾
入蒼舒萬斛舟至今鼻對蘸清流君王玉輅催行駕安得身閑
伴白鷗卽令人歸刻其詩於水中九靈岩壁以實明問一日
上御五鳳樓工部進吞船之伎羣臣觀侍衆皆以見吞對凱見獨
不然 上問之凱曰臣惟見蓮船走耳 上遂疑之先是 命

凱與尚書開濟作天下民籍易見圖乃定格眼以進固嘗疑其志高矣至此又疑復夢龍遜於凱所居門遂快然不樂尋出爲湖廣行省叅政於時凱從弟中吉走省告歸凱曰汝可俟明春二三月數將至矣我其如難何中吉曰何不謝事南旋凱曰宿緣在此昔嘗避之而不得我骨雖貴而汗不香死於國事亦不失爲忠義鬼逃之奚免耶會使高麗主客誤用符驗上坐與知罪遂曰臣受知於陛下官高一品壽至七旬死復何憾雖向有金牌免罪之旨亦不自表也翌日上傷悼之尋楚王求其師弗得憤入金水橋下羣臣解衣履下救者及法官以不復奏受死若干員隨贈太子少保以旌其忠洪武八年三月也葬

長潭山下

楊訓文字

四川潼川州人故元淮海書院山長遇亂不出

乙巳年王師下揚州以儒士見留侍左右五月拜起居注上

諭訓文曰起居之職非專事紀錄而已要在輸忠納誨致主於
無過之地而後爲盡職也爾素稱謹厚當始終一致苟易其所
守則患必生矣譬如馳馬能戒於險阻則不墜肆意於平曠則
顛蹶吾每以此自警故以示爾等他日復命訓文同滕毅集古
無道之君所行之事以進曰往古人君所爲善惡皆可見爲龜
鑑吾所觀此者正欲知喪亂之由以爲之戒耳尋遷中書省左
司郎中洪武元年陞太常寺卿二年出知湖州三年移知汀州

四年陞禮部尚書協陶凱理部事是歲肇舉進士命禮部尚書陶凱與前侍講學士潘廷堅爲會試主司侍講學士詹同國子司業宋濂吏部員外郎原本前貢士鮑恂爲同考至廷試又命訓文協陶凱提調得進士吳伯宗一百二十人號稱得人本年改戶部詳國初戶部

牛諒字

■

山東兗州府東平州人洪武元年以秀才舉擢典

簿二年同學士張以寧出使安南至界日燧已卒其姪日燧立以寧護勅印留洱江使諒入其國諭以來意諒宣德威黎人效順三年回京以使稱 旨陞工部員外郎四年廷試進士充掌卷官五年陞禮部尚書六年命承旨詹同等制釋奠先師孔子

樂章諒以所定禮儀進自遣官傳制以至行事皆典儀唱禮迎神三獻撤饌皆奏樂用同等所定樂章制曰可又奉命定大祀分獻禮上初獻禮畢分獻官卽行初獻亞獻終獻亦如之又上建陪祭官齋房於北郊齋宮之西南命諒與承旨詹同等議省牲所用冠服同等奏玉藻君皮弁以日視朝遂以食則皮弁似與命常服之服同今中祀旣以皮弁行禮則省牲上用常服又上命禮官參考歷代帝王廟祀諒奏三王開天立極大有功德於民京都都有廟春秋享祀宜令太常掌之伏羲以勾芒配一神農以祝融配黃帝以風后力牧配正位南面祀以太牢配位東面祀以少牢漢高祖光武唐高祖太宗宋太祖元世祖宜令

有司就各陵立廟每歲仲春以少牢致祭商中宗高宗周成王
康王漢文帝武帝宣帝明帝章帝唐玄宗憲宗後唐明宗周世
宗宋太宗真宗仁宗亦宜令有司立陵廟三年一祭祭以少牢
上曰五帝三王及漢唐宋創業之君俱宜於京師立廟致祭其餘
守成賢君令有司祭於陵廟皆每歲春秋祭之又詔定文武官
誥命制度命諒與學士宋濂曰前代侍於朝者必有封贈施恩
之典旣封贈則必給以誥命所以上榮其祖考下及其子孫也
卿等宜稽古詳定其式於是諒等奏參考唐宋誥命皆由三省
官例御書名復用吏部告身印章本朝誥勅旣用御寶則省臣
不敢署見造誥勅花樣籤軸制度皆有等第不須改作又宋紹

興年間工部言官誥所用綾紙易壞乞下文思院織一體花樣
專充官誥今議於誥尾添織某第幾號以爲關防又取工部鼎
制勅局已造完誥命書寫用寶頒於文武官從之其制公侯一
品至五品誥命六品至九品勅命公侯及一品誥軸用玉伯子
男及二品用犀五品以下用角七年十一月勅禮部官定喪服
之制諒奏周禮儀父在爲母服期年若庶母則無服 上曰父
母之恩一也喪服低昂若是其不近於人情甚矣乃勅翰林學
士宋濂等曰養生送死聖王之大政諱忘忌疾衰世之陋俗三
代喪禮節文尤詳而散失於衰周厄於暴秦漢唐以降莫能議
此矣人情有無窮之變爾等其考定喪禮於是濂等考得古人

論母喪者凡四十二人願服三年者二十八人服春年者十四人奏之諒爲人朴實議禮精密本年以事降忝罷主事尋復前職未幾致仕

劉昭先字宗啟

人洪武初舉人才三年除吉安府

太和知縣六年拜禮部尚書協牛諒理部事七年免

呂本字

直隸鳳陽府壽州人故元都事丙午年歸附授中

書掾史吳元年授湖廣行省照磨洪武三年陞中書省右司郎中四年改左司郎中五年歷刑部侍郎尋進吏部尚書六年改太常寺卿七年以事左遷北平按察司僉事尋召還授禮部尚書八年正月諭本令天下有寄跡佛老志尚聖賢者許入國

學以習天理民彝乃昇之以政本年出爲兩浙都轉運鹽使十三年復授太常寺卿十四年以疾卒於官詳國初太常寺

張善字

人卽章善洪武八年擢禮部尚書本

年命署行省叅政後以事免

張籌字惟中直隸常州府無錫縣人故元浙江鄉試第一未仕洪武四年吏部尚書詹同薦籌有文學應奉翰林文字授禮部主事奉詔同禮部尚書陶凱等采摭漢唐以來藩王善惡可爲勸戒者爲昭鑑錄五年冬會凱出叅湖廣行省編集未成至六年籌亦陞廣東行省叅政九年陞禮部尚書值晉王妃謝氏薨命籌同學士宋濂議喪服制籌以濂議奏上按唐制皇帝爲皇

妃等舉哀畢則常服宋制皇帝爲皇親舉哀素紗幘頭白羅衫
黑銀帶令叅酌唐宋之制 皇帝及中宮服大功諸妃皆服小
功南昌王妃服大功東宮親王公主皆服小功晉王服齊衰杖
期靖江王服小功王妃服總麻輟朝三日旣成服 皇帝素服
入喪次十五舉哀百官奉慰 皇帝出次釋服服常服制曰可
命著爲令十年坐事罰輸作十二年起禮部員外郎尋以事免
朱夢炎字仲雅江西南昌府進賢縣人元至正辛卯進士爲撫
州金谿丞歲丙午以故官入京延居上賓館 命與儒士熊鼎
等集古忠奸邪事實以恒辭直解之爲公子書及務農技藝
商賈書使貴賤之家講誦通知大義書旣成有白金及衣帽靴

韓之賜俄除國子監博士俾領胄子教之夢炎日以所爲書訓
廸諸生使讀誦經書無有弗率教者上時召問夢炎奏對詳
雅應制作爲文章皆典則有據上益重之吳元年遷翰林修
撰坐小誤出爲浙江按察司經歷洪武二年轉山西行省員外
郎是年入爲禮部員外郎陞侍郎十一年四月陞吏部尚書夢
炎博學善記通歷代文獻之學如指諸掌朝廷稽古議禮審
樂皆有力焉十三年卒於官

鄭九成字

人洪武十年擢河南按察使十三

年陞禮部尚書本年免

倪斯字

應天府溧陽縣人故元嘉定州知州來附王師吳

元年授兵部員外郎本年擢尚寶符寶郎洪武元年遣斯齋璽書賜高麗二年高麗遣使上表來貢方物遣斯齋印封之改尚寶司丞仍以祝文牲幣祭其境內山川詔曰朕肇膺正統誕撫多方乃眷爾高麗襲朝鮮之遺壤克遵中夏逾渤海而稱臣頃詔使之往廻卽表詞之來上有加方物良切衷情益由夙慕於華風用是恪修於臣職况爾三韓之屢世皆慎始終屬茲四海之一家何殊內外爰稽彝制載錫真封今遣某官齋印仍封爾爲高麗國王於戲保民社而王纂榮懷於舊服守禮義之國作屏翰於東藩其始自今毋替朕命故茲詔云想宜知悉使回稱旨日侍左右四年出知泰安州六年陞河間府知府俱以才幹著

而民亦不擾九年入爲戶部郎中尋陞戶部尚書本年調山西
左叅政十三年正月召拜吏部尚書二月改禮部尚書三月詔
定公侯稱號 上諭斯曰自今封公侯不必加以散官已授券
誥者且仍其舊若追封公侯生則曾佩將軍印者仍列於銜於
是斯等奏定則式爲三公侯之銜曰開國輔運推誠宣力武臣
某公某侯食祿若干石世襲者曰世襲某公某侯食糧若干石
追封者曰開國輔運推誠宣力武臣某將軍某公某侯追封某
王某公謚某本年以年老致仕

李冕字

人洪武十一年拜禮部侍郎十三

陞試禮部尚書十四年以事免

李叔正字克正初名宗頤江西南昌府靖安縣人其先唐宗室世家四會至殿中侍御史翰林學士積中始家南昌方孕父與母俱夢異僧以金盤藉一小兒入肚內及生頤異善記年十二以能詩聞人以神童呼之既長博通諸子百家之言江西十才子叔正其一也方陳友諒陷南昌時妻夏氏投井死叔正終身不再娶歲丙午初設國子學有以宗頤名薦者擢爲學正洪武三年告歸田里許之既退自齒於齊民已而廷臣以大學舊僚文行兼備無若叔正者登名薦剡誤以克正爲叔正四年徵至京師仍除國子學正遷渭南縣丞時同州人與蒲城人爭地連年不決行省以是事委之叔正卽單騎至其處召二家至前立

談而決縣歲輸糧二萬而田無定額乃卽里社丈量立法密而
用刑嚴奸慝警服畢獻其誠於是豪右失計公私交便遷興化
知縣尋召爲禮部員外年老乞骸骨不許除國子學助教叔
正凡三至大學至是日與諸生講解立課程而督勉之雖貴胄
待之愈嚴旦夕端坐聽察誦習無倦容暇輒會計廩饌毫髮無
取欺者朝論推讓其賢能遂遷監察御史嘗奉命巡嶺表
因適瓊州府吏訐告其守進表公座僉名鞠之抵吏罪而守之
誣得直上聞而大悅獎諭之曰人言老御史懦乃明斷如是
邪九年擢湖廣叅政十年陞布政使十二年召還爲禮部侍郎
十四年陞本部尚書七月日本國王良懷遣僧如瑤等貢方

物及馬匹 上命却其貢仍命叔正等修書責其國王曰大明
禮部尚書致意日本國王王居滄海之中傳世長民今不奉
上帝之命不守已分但知環海爲險限山爲固妄自尊大肆侮鄰
邦縱民爲盜 帝將假手於人禍有日矣吾奉 至尊之命移
文與王王若不審巨微效井底蛙仰鏡觀天自以爲大無乃溝
隙之源乎王涉獵古書不能詳細如號曰倭然惡其名遂改日
本自漢歷魏晉宋梁隋唐宋之朝皆遣使奉表貢方物當時帝
王或授以職或爵以王或睦以親由慕意誠故報禮厚也若叛
服不常構隙中國則必受禍如吳大帝晉慕容廆元世祖皆遣
兵往伐俘獲男女以歸千數百年間往事可鑒也王其審之十

年卒於官壽六十四

高信字

浙江金華府義烏縣人洪武中由歲貢入太學十

三年授戶部郎中十四年陞戶部侍郎與尚書闕縣范敏常山
徐恢俱相善能舉其職十五年陞試禮部尚書在部無所建明
本年以年老致仕

劉仲質字文質江西袁州府分宜縣人敏而好學博通經史洪
武初舉薦宜春訓導被薦入京奏對稱旨擢翰林典籍階文林
郎日侍左右十二年命校正春秋本末十五年春特拜禮部尚
書四月諭仲質曰孔子明帝王之道以教後世使君君臣臣父
父子子綱常以正彝倫攸敘其功參乎天地今天下郡縣廟學

並建而報祀之禮止行京師豈非缺典卿與儒臣其共定釋奠
禮儀頒之天下學校令以每歲春秋仲月通祀孔子丁巳上
謂仲質曰國學新成朕將釋菜令諸儒議禮議者曰孔子雖聖
人臣也禮宜一奠而再拜朕以爲孔子明道德以教後世豈可
以職位論哉昔周太祖如孔子祠將拜左右曰孔子陪臣不宜
拜周太祖曰百世帝王之師敢不拜乎遂再拜朕深嘉其明斷
不惑於左右之言今朕有天下敬禮百神於先師之禮宜加尊
仲質乃與儒臣定議上服皮弁服執圭請先師再拜獻爵後
又再拜退易服請癸倫堂祭酒司業博士助教進講賜坐侍
臣以次於東西講畢宣諭學官諸生而還明日祭酒率學官

上表謝 上從之十一月奉 勅旨條成學矩一十二款合

太和欽定九條梓行以頒賜師生本月奉命頒劉向說苑新序於天下學校令生員講讀十一月戊午敕宋殿閣大學士之制以仲賢爲華蓋殿大學士宋訥爲文淵閣大學士吳伯宗爲武英殿大學士吳沈爲東閣大學士 上親製誥文賜仲賢曰朕閱宋書見尚文之美崇儒之道廓焉且當時諸儒皆以賢德輔景運三百有奇焉今特倣宋制殿閣之名必期近侍有補文並歐蘇簡仲賢才頗稱任授以華蓋殿大學士奉議大夫爾往欽哉未幾質坐事降監察御史後以年致仕仲賢爲人篤厚文多質實如其人詞林記誤作邵質卽仲質云

任昂字

河南開封府河陰縣人博覽羣書早有才譽故元

舉進士拜山西寧晉縣知縣不受隱居山林日以經史自娛洪武初年以儒士薦舉授襄垣訓導雅志作人多所成就十一年擢監察御史十五年陞禮部尚書十六年正月上命昂同太師李善長及諫院翰林院等官往監考定教官生員高下分列班次規矩煥然明備於是奸弊盡革增立監規八條三月廣東都指揮使狄崇王孫言妣阮氏昔封淑人已沒仍乞封次妻何氏等爲淑人詔下廷臣議昂同李善長議曰禮莫大於分分莫大於名妾不可爲嫡夫人故莊公妾成風倍公母也稱爲夫人春秋非之哀公庶子荆之母嬖將立爲夫人使宗人躋夏獻其

禮對曰無之昔周公武公娶於薛魯惠娶於商自桓以下取於齊此禮則有若以妾爲夫人則古無其禮蓋古者夫人沒貴妾攝其家事不得稱爲夫人爲庶子而貴得以推恩其母亦不得稱夫人使並嫡也今崇臻至欲任私意廢大禮亂嫡妾之分不可許 上從之遂命昂及翰林院儒士定嫡妾封贈例頒示中外於是定議凡正妻在日所娶側室皆謂之妾正妻沒諸妾不許再立爲妻若以禮聘良家女爲妻許授封贈前妻無子其所生子卽爲嫡長子若正妻在日無子不許再娶而諸妾有子者以長男襲父職其子以本品推恩其母俱從之十七年二月奉命頒行科舉成式凡三年大比子午卯酉鄉試辰戌丑未會試

不拘額數六月 上諭昂等曰近命製大成樂器將以頒天下
學校俾諸生習之以祀孔子朕思古人之樂所以防民慾後世
之樂所以縱民慾其故何也古樂之詩章平而正後世之歌詞
淫以誇古之律呂協天地自然之氣後之律呂出人爲知巧之
私天時與地氣不審人聲與音樂不比故雖以古之詩章用古
之器數亦乖戾而不合陵犯而不倫矣手擊之而不得於心口
歌之而非出於志人與樂判然爲二而欲以動天地感鬼神豈
不難哉然其流已久救之甚難卿等宜求諸此俾樂成而頒之
諸生得以肄習庶幾可以復古人之意是年甲子初科監生舉
首且中式者過半 高皇帝喜甚而諭祭酒宋訥以爲教導之

功九月十三日昂侍華蓋殿 上諭昂曰在京鄉試多有取中的國子監生爲他肯學所以取中似這等生員好生光顯他父母恁禮部出榜於原籍去處張掛着他鄉里知道自是科舉之途始重矣本年命署吏部事未幾以年老致仕詳國初吏部

趙琨字



河南河南府宜陽縣人喜讀書博學洽聞洪武八

年舉儒士任河南府學訓導歷廣東瓊州府知府吏民畏服坐事免十七年九月起左春坊左諭德本年十月陞禮部尚書十八年遷吏部尚書坐禮部盜官糧伏誅詳吏部

唐鐸字振之直隸鳳陽府虹縣人元末從軍守濠州由紹興府知府累官刑部尚書改太常寺卿晉兵部尚書改諫議大夫十

七年坐事監監察御史陞右副都御史洪武十九年復刑部

尚書本年命署禮部事二十一年復還兵部尚書詳兵部

李原名卽彥名字資善直隸保定府安州人洪武中以通經儒

士舉用至京洪武二十年試禮部尚

書六月上語原名曰尚齒所以教敬事長所以教順虞夏商

周之世莫不以齒爲尚而養老之禮未嘗廢是以人興於孝弟

風俗淳厚治道隆平曩者朕詔天下行養老之政凡耆民年八

十以上鄉黨稱善貧無產者月給米五斗肉五斤九十以上歲

加帛一疋綿一斤若有田產能自贍者止給酒肉絮帛其應天

鳳陽二府耆民九十以上賜爵社士八十以上賜爵里士歲許

冠帶復其家尚慮有司奉行不至爾其以朕命申之二十一年
詔定歷代帝王名臣從祀原名奏以風后力牧臯陶夔龍伯夷
伯益伊尹傳說周公旦召公奭太公望方叔召虎張良蕭何曹
叅周勃鄧禹諸葛亮房玄齡杜如晦李靖郭子儀李晟趙普曹
彬韓世忠岳飛張浚博爾术赤老溫伯顏阿木安童凡三十六
人 帝曰古之君臣同德者始終一心載在史傳萬世不泯國
家祀典必洽公論不可徒觀其迹而不究其實若宋趙普負太
祖爲不忠不可從祀元臣四傑木黎華爲首不可以其孫從祀
而去其祖可祀木黎華而罷安童旣祀伯顏其阿木亦不必祀
如陳平馮異宋潘美皆節義凜然兼全始終可從廟祀餘悉如

原名所擬凡三十七祀 帝王廟庭三月 上親策多士臨軒
命題策問祀禮命戶部右侍郎沈士榮翰林學士劉三吾等讀
卷賜進士及第任亨泰等九十七人又命原名礪石題名祭酒
宋訥撰記二十二年冬命原名申巖巾帽之禁凡文武官除本
等紗帽外遇雨許戴雨帽公差出外許戴帽子入城不許其公
差人員出城外者亦如之將軍力士校尉旗軍常戴頭巾或櫛
腦官下舍人并儒士吏員人民常戴本等頭巾鄉村農夫許戴
斗笠蒲笠出入市井不禁不親農桑者不許入魯王檀薨詔議
喪制原名等奏曰考制喪制宜輟朝五日皇帝於諸子無服宜
素服五日而除諸王齊衰期年以日易月十三日素服期年世

子郡王服與親王同公主服齊衰期年下嫁者服大功九月郡主服同公主諸王妃及靖江王世子郡王皆服小功五月從之二十三年二月命考定合祀山川上曰王國有嶽鎮海瀆者卽以嶽爲正次海次鎮次瀆風雲雷雨之神又次之於是原名爲圖以進使頒諸國復圖命東海則燕齊晉祭東嶽東鎮齊魯皆祭西海秦蜀皆祭晉祭北海三月甲寅定官民節先是上見朝臣所服之衣多取便易日就短窄有非古制乃令原名同國子司業龔穀忝酌時宜俾存古意原名等議定凡官員衣服寬窄以身爲度文官衣自領至裳去地一寸袖長過手復回至肘袖椿廣一尺袖口九寸耆民儒士生員制同惟袖過手復回不

及肘庶民衣去地五寸武職官衣長去地五寸袖長過手七寸袖椿一尺袖口僅出拳公侯駙馬武服同軍人衣長去地七寸袖長過手五寸袖椿廣不過七寸袖口僅出拳著爲定例頒示中外原名議禮精密多見施行後以年老致仕南京禮部題名誤以資善與原名爲二人今考定爲原名字云

趙勉字

湖廣

荊州府夷陵州人洪武乙丑進士授審刑司

左詳議陞大理寺丞二十年陞大理寺卿二十一年陞刑部左侍郎累陞刑部戶部尚書二十四年命以戶部署禮部事二十五年坐贓罪詳戶部

楊靖字仲寧直隸淮安府山陽縣人洪武乙丑進士改庶吉士

試事戶科有才幹本年陞戶部侍郎二十二年累陞戶部尚書
改刑部兼太子賓客二十六年命以刑部署禮部事二十八年
元官後起左都御史掌院事詳國初都察院

任亨泰字

湖廣襄陽府襄陽縣人由歲貢入太學中洪武

十八年三月殿試擢亨泰第一召祭酒宋訥褒諭之命撰進士
題名記立碑於監門授翰林院修撰二十五年改詹事院爲府
起兵部尚書詹事兼詹事尋陞亨泰少詹事仍兼修撰二十七
年五月癸亥上重其學行擢禮部尚書時青州日照民江伯
兒以母病割股肉食之不愈乃禱於岱嶽祠誓云母病愈則殺
子以祀既而母病愈竟殺其三歲子祭有司以聞上怒曰父

子人倫至重。禮父爲長子三年服。今百姓無識殺其子絕滅倫理。宜亟捕治之。勿使傷壞風化。遂逮伯兒杖一百。謫戍海南。因命禮部定議旌表孝行事例。行於天下。亨泰等議曰。人子之事親居則致其敬養。則致其樂。有疾則托之良醫。投以善藥。至於呼天告地。思慕懇切之至此。爲人子所當爲也。卧冰割股。前古所無。雖出後世。亦是間見。至若割肝殘害尤甚。且如父母止有一子。割肝割股。或至喪生。卧冰或至凍死。使父母無依。宗祀永絕。反爲不孝之尤者。原其所自。皆愚昧之徒。務爲詭異以警世。駭俗。希求旌表。規避差役。割股不已。至於割肝。割肝不已。至於殺子。違道傷生。莫此爲甚。自今人子遇父母有疾。醫治弗愈。無

所控訪不得已而割肝卧冰亦聽其所爲不在旌表之例詔從之又詔國子博士錢宰等至上語正定蔡氏書傳且曰爾等知天象乎皆對以不知上曰朕觀天象自洪武初有黑氣疑於奎壁乃文章之府朕其異焉今年春暮其間黑氣始消文運當興爾等宜考古証今有所述作以稱朕意於是命翰林院學士劉三吾等總其事開局翰林院正定是書時禮待諸儒甚厚各賜以綺縉衣被等物又御製詩令次韻和之朝恭則班於侍食之前宴享則賜坐殿中時酒樓成人賜鈔宴其上各獻詩謝上大悅復遣亨泰諭旨諸儒有年老願歸先遣之衆皆願留至是書名蔡氏集傳得者存之失者正之又集諸家之說

足其未備三五等率諸儒上進賜名曰書傳會選命禮部刊行
天下賜諸儒及宴鈔俾馳驛而還二十八年三月秦王檇薨詔
定喪禮亨泰奏曰考之喪制宜報朝五日今遇時享宜暫輟朝
一日服制與魯王同從之四月辛未上諭亨泰曰秦王旣沒
國事無統世子長成宜命襲爵爾其集議以聞亨泰同翰林諸
臣議漢諸王薨遣使者并嗣爲王則玄冠衰經素服以承詔事
畢反喪服諸侯受天子之命亦宜服其命服使者出反喪服卽
位而哭旣合於禮且協人情詔依服命禮部行之六月王科給
事中陳洽等奏凡大臣犯重罪雖蒙恩宥不宜仍列本班必
少加降抑示勸懲上從之詔禮部凡大臣犯重罪得免者敘

列八品九品理後九月庚戌頒祖訓錄章於内外文武諸司
論聖祖自古國家建立法制皆在始受命之君以後子孫不過
遵守成法以安天下蓋創業之君起自微側備歷世故艱難周
知人情善惡後世守成之君生長深宮未諳世故山林初出
之士自矜已才至有奸賊之臣御權利作聰明上不能察而信
任之變更祖法以敗亂國家貽害天下故日夜精思立法垂後
永爲不刊之典如漢高祖刑白馬盟曰非劉氏者不王以後諸
呂用事咸改其法遂至國家大亂劉氏幾亡此可爲深戒者朕
少遭離亂賴 皇天眷命剪除羣雄混一天下卽位以來勞神
焦思定立法制革故元弊政至於開導後世復爲祖訓一編立

爲國法俾子孫世世守之爾禮部其以朕訓頒行天下諸司使
知朕立法垂後之意永爲遵守後世敢有言改更祖法者卽以
奸臣論無赦十月辛卯朔享泰曰百官朝參賜食實出厚恩緣
職事衆多俱億爲難請罷賜從之先是每旦視朝奏事畢賜
百官食上御奉天門或華蓋武英等殿公侯一品官侍坐於
門內二品至四品及翰林院等官坐於門外其餘五品以下官
於丹墀內文東武西重行列位贊禮贊拜叩頭然後就坐光祿
寺進膳案後以次設饌食畢百官仍拜叩頭而退率以爲常至
是始罷十一月出使安南時將征龍州以其地界安南故先命
亨泰同監察御史嚴震直奉制書諭之因語亨泰曰龍州之役

其師略衆然地連安南彼中必疑宜令預知趙宗壽之罪且古
哲王之令典分茅土者不循王命有征伐之誅今壽所爲必當
問罪師行遣人諭安南慎守邊毋生納匿之釁王若一如朕命
彼此邊徼之民萬全矣亨泰等至丘溫先以書遺王其略曰亨
泰等辭闕之日面奉 旨諭雲南梁王元之子孫本欲存宗祀
柰何自謀弗靖匿遁逃誘邊人天討不容所以滅亡今龍州不
臣允廷臣議奏興十萬之師問彼之罪地界安南五縣人民若
有容納遁逃者盡行剿除然猶念前王之篤實憫嗣王之弱冠
復恐國人驚駭故遣亨泰等親詣安南款諭國王日煊以中朝
狀元又學泰議論英發敬之盡禮至二十九年春二月使還

上聞其在安南私市蠻人爲僕降爲監察御史後以事免

門克新字

陝西華昌府秦州人爲人寬厚和易始爲本州

儒學訓導二十六年秩滿來朝時天下學官入覲者咸命侍朝

或試文辭詢問經史及民間政事得失在列者多應對不稱旨

獨克新敷奏亮直上甚重之時紹興府儒學教授王俊華亦

以善文稱旨遂擢俊華爲右春坊右贊善克新爲左春坊左贊

善二十九年正月陞禮部尚書八月以疾請告命太醫給藥物

不輟其祿已而病革遂卒上嗟悼遣官祭之命有司護喪歸

葬於鄉

鄭沂字仲興浙江金華府浦江縣人宋時旌表義門之裔國

初天兵下浙東甫定金華選良家子弟爲叅隨舍人大將軍取
衛處溫台等州沂居行間著能聲旣而還京師仍命歸鄉里洪
武二十五年宣召義門子弟年三十以上者至 御前選擇備
用沂其一焉三十年八月又徵取大姓賢能者授以重任吏部
引奏 上特召沂詣前語曰爾家大孝大義累世同居前朝雖
嘗仕宦我今使汝大貴 御筆親除爲禮部尚書夙夜祗畏恪
恭乃職同寅協和有如兄弟於時新剏大理寺命各部官會同
審囚沂再三詳獻無一人枉濫三十一年正月 郊祭前期命
焚諸城隍寺大雨禮畢雨忽止夜半_卷垣月明星朗大禮慶
成 天顏喜甚未幾奉 旨往山西祭晉恭王五月還朝 太

祖疾太漸既而賓天與祭禮畢卽引年致事東歸永樂二年

成祖思念舊臣復召沂授以前職蒞事三月憫其力衰不煩以政

特製誥命賜歸有世享孝友天稟忠淳之語四年 朝廷新禮

樂修永樂大典訪求天下圖書與姪監察御史幹以義門家藏

書籍及龍吟雅灰二琴上進蒙 賜白金百兩寶鈔一千二百

錠文綺四端有副四年入朝 賜白金五十兩寶鈔四百錠文

綺二端有副是皆累蒙之恩也六年鄉人誣告義門私造軍器

朝廷遣官搜索一無所有止有舊紅漆器尚存以 罪坐家長罰

當之沂請前請曰家長乃某之兄昏耄無聞知某嘗爲禮官不

能使家衆遵國法罪坐某兄弟爭再三事聞於 朝未幾蒙

恩宥仍賜冠帶還家八年 大駕巡北京召致仕老臣南京聚會
同館待以優禮五日一朝 東宮沂嘗爲領袖 駕還賜燕東
歸十年三月忽得氣疾浹旬一日呼二子杓槃來前曰吾仰賴
天子寵光祖宗德澤白衣授以尚書今年踰七十以疾終於正寢
幸莫大焉爾等當一心向公力行義事以圖報効言畢忽風雨
大作頃焉風靜雨止倏然而逝享年七十有五

陳廸字景道直隸寧國府宣城縣人廸自幼倜儻有志操洪武
中辟郡學訓導己未以通經召除翰林院編修己丑二月陞侍
讀預修大典辛未八月陞山東布政司左叅政捕蝗弭盜民甚
德之甲戌十月丁內艱奪情起復辭不允乙亥二月陞雲南左

布政使曹定出靖烏祿烏祿等處苗賊沮遏率土兵擊破之
獻俘於 朝有白金綵幣之賜戊寅八月徵詣行在陞禮部尚
書授特進榮祿大夫庚辰水旱有 旨集議迪言刑獄未清宜
勅法司擇公廉仁厚者分詣郡縣審檄獄囚勿令久淹致傷和
氣又言逃民家業旣喪且畏公私逋負之迫失今不恤必嘯聚
爲惡宜使有司招來之其不願歸者聽附籍種田暫免其差役
則民安而盜息矣 上皆從之辛巳二月加太子少保辭所兼
俸不受靖難師迫與黃子澄等上疏陳論大計迪受 命僨運
糧儲於外過家未嘗入聞變卽赴京師 成廟繼統召迪責問
迪謾罵不屈與子鳳山丹山等六人同日就戮將刑鳳山呼曰

父親累我迪叱使勿言因罵不絕口命割二子鼻舌熬熟俾食之迪吐唾之益肆指斥遂俱凌遲而死人於衣帶中得詩有云三受天王顧命新山河帶礪此絲綸千秋公論明於日照徹區區不二心又有五噫詞並悲烈不傳有老蒼頭侯來保拾其遺骸歸葬之計家橋洪熙初詔釋迪宗姻在戍所者還鄉給復產業成化壬寅郡人祀鄉賢祠甲辰郡守復於迪故居祠祀之近吏部尚書李默作新建祠記載寧國誌

李銅字至剛以字行直隸松江府華亭縣人少穎敏不羣嘗從學楊廉夫爲詩文有清思洪武戊辰舉明經奉命侍懿文太子初授祠部試郎中旣實授坐累謫戍邊無幾召還爲虞部

郎中二十八年陞河南布政司右叅議會河決汴隄居民危懼
全剛建議假王府積木作筏濟之人賴全活甚衆章除中陞湖
廣布政司左叅議壬午年 成祖入正大統來朝大臣有言其
才且洪武舊人遂以爲通政司右通政尋命與修洪武實錄且
朝夕在 上左右道說洪武中事甚親密是冬陞禮部尚書時
禮部之務雖叢脞長於剴繁條理井然益見 寵遇十一月奉
命清理釋道二教凡歷代以來及本朝洪武十五年以前寺觀有
名額者不必歸併其新創者悉如舊清查永樂元年正月至剛
等言自昔帝王或起於布衣平定天下或繇外藩入承大統而
於肇跡之地皆有陞崇切見北平布政司實 皇上承運興王

之地宜遵 太祖高皇帝中都之制立爲京都制曰可其以北
半爲北京四月丁未安南權理國事胡奎遣使賀卽位求賜封
爵下禮部議至剛等言遠夷恍忽難信宜遣使廉察從之己卯
至剛妻父坐事都察院作文當處以重法至剛言於 上希恩
乞免 上曰法司鞠獄情之輕重外人何以知之對曰此都察
院都御史黃信與臣言遂爲刑科都給事中周璟等所劾 上
命錦衣衛鞠之有實狀特命誅之庚辰至剛等奏五月初十日
恭遇 太祖高皇帝忌考宋會要凡國忌前後二日不行刑不
視事不舉音樂禁屠宰百官赴景靈宮奉眞殿行香今議得忌
辰前三日 上服淺淡衣服御西角門視事至日早於奉天殿

祭祀初八日至初十日不鳴鐘鼓不行賞罰不舉音樂禁屠宰
文武官自初八日服淺淡衣服黑角帶侍朝至日早起 孝陵
行禮從之仍命八月初十日 孝慈高皇后忌辰禮亦如之於
是至剛復言宋制凡忌日於各佛殿誦經設帝后位百官行香
今後宜依宋制於天禧等五寺并朝天宮令僧道誦經三晝夜
上曰予於父母固當無所不用其心但人君之孝與庶人不同爲
人君者奉 天命爲天下主 社稷所寄生靈所依但當謹身
修德體 天心恪修成憲爲經國遠謨使內無奸邪外無盜賊
宗社莫安萬民樂業斯孝矣如不能此惟務修齋誦經抑末矣先
是 上謂廷臣曰北京朕舊封國有國社國稷今旣爲北京而

社稷之禮未有定制其議以聞至是至剛同太常會議以爲朝廷王國及府州縣社稷俱有定制考之古典別無兩京並立太社太稷之禮今北京止宜設官看守如遇皇上巡狩之日於內設太社太稷之位以祭仍於順天府別建府社稷令北京行部官以時祭祀上可其議乃命依在京山川壇祭署例設北京社稷壇祠祭署奉祀署丞各一員隸北京行部五月至剛等言舊制應天府不設上元江寧二縣學今旣設北京國子監以順天府學爲之革大興宛平二縣學而以大興縣學爲順天府學其順天府學及二縣生徒通經能文者令充北京國子監生其餘皆充順天府生從之十月至剛言洪武中開平忠武王常

遇春祠墳俱有定制建文中增修過度請復其舊從之後實錄
成有白金文綺金織衣之賜永樂二年春冊立 皇太子命以
尚書兼左春坊大學士東宮開經筵與右春坊大學士解縉最
先進講及修永樂大典四方文儒皆集仍命董之六月甲午

上諭至剛曰會試下第舉人既多其中必尚有可取者蓋慮一時
匆卒或本有學問而爲文之際記憶偶差遂至謬誤而考閱之
官神情疲倦失於詳審以致黜落此皆可矜其令翰林院出題
更擇文詞優等者以聞遂得貢士張玄等六十人 上召見皆
賜冠帶命入監進學以俟後科且勉之秋七月壬戌饒州鄱陽
民朱季友進書謗毀聖賢至剛請寘於法 上曰愚民不識

之將邪說有誤後學卽遣行人押還鄉里會布政司按察司及
府州縣杖之一百檢搜所著文字悉毀之仍不許稱儒教學冬
十一月至剛言歲貢生員坐懷挾充吏者送翰林院再考中式
送監讀書從之已而再考不中乃發充吏三年爲侍郎宋禮所
間見疏歲餘降儀制郎中然遇劇務必以屬之初解縉素相厚
成祖御書大臣十人命品評縉於至剛則云誕而附勢雖才不端
旣縉遭譖出至剛懷宿恨言其怨望中傷之後召下獄而并下
至剛 仁廟嗣位念其舊功臣復以爲左通政數月又念其老
不任朝叅改知興化府時 朝廷方需仁澤於天下至剛勞心
撫綏郡民德之再歲歿於官宣德丁未四月七日也享年七十

餘冬云解縉侍 太宗諭及羣臣御書憲義等十人名命各疏
於下既奏 上以授 仁宗曰李至剛朕洞燭之矣餘徐驗之
後十餘年 仁宗出其所奏十人者示楊士奇曰人率謂縉狂
士縉非狂士向所論皆定見也此事楊公既著於 聖諭錄於
解墓碣內又載之墓碣載解被庶人譖出爲廣西叅議以李至
剛言其怨望又改交趾後入奏事庶人復有言遂徵下獄後三
年病死獄中李至剛墓表亦楊所作載李言解事詔下獄而并
下李今莫知其悉李之言解其因解有誕而附勢雖才不端之
奏而怨之故歟 上之并下李也所謂洞燭之者有在矣噫小
人之怨君子事每如此小人終亦何利解死於獄中而李不死

則命也 仁宗臨御既明解冤又官其從子爲中書李雖寅緣
官官改爲通政尋出知遠郡賢否在 聖衷其彰彰矣乎

鄭賜字

福建建寧府甌寧縣人洪武甲子鄉舉乙丑登進

士擢監察御史二十五年秩滿陞湖廣右叅議尋丁母憂二十
七年起復補北平右叅議革除中附 成祖甚見親幸謀國者
以其反復謫置安東屯尋起工部尚書 成祖入正大統時六
卿死難者禮部尚書陳迪兵部尚書齊泰刑部尚書侯泰賜同
吏部尚書張統戶部尚書王鈍及侍郎蹇義夏原吉等歸附時
奉天殿爲建文所焚賜承 命改作奉天殿之西踰月擢改刑
部尚書永樂元年二月奉 命嚴禁誣告法凡誣告三四人者

杖一百徒三年五六人者杖一百流三千里所誣重者從重論
誣告十人以上者凌遲處死梟首其鄉家屬遷化外九月承天
門守衛千戶奏先晚工匠出門遺木牌無姓名有寶鈔提舉司
字且條列本司官吏不法數事 上諭法司曰投匿姓名文書
告言人罪者律有明禁此蓋小人假公法報私忿誣陷忠良其
毀之自今有此者悉勿問十一月康孔高先任祁陽縣知縣建
文中謫敎大理縣至是例得復祁陽孔高朝京師還枉道過家
省母母適病留侍九閱月不行賜等逮問孔高舉當杖仍謫敎
遼縣以聞 上曰母子之愛本於天性朕違萬里數年一旦相
見已難遽舍况於有病是可矜也免杖復其官三年卒至剛以

罪謫改賜爲禮部尚書四年丙戌二月知貢舉取朱縉等一百
十九人故事以三月朔 廷試是日 駕幸太學初 上勅禮
部曰朕惟孔子帝王之師帝王爲生民之主孔子立生民之道
三綱五常之理治天下之大經大法皆孔氏明之以教萬世朕
皇考太祖高皇帝膺君師億兆之任正中夏文明之統復衣冠禮
樂之舊渡江之初首建學校親祀孔子御經筵講書守帝王之
心法繼聖賢之道學集其大成以臻至治朕承鴻業惟成憲是
遵今當躬詣太學釋奠先師以稱崇儒重道之意其合行禮儀
禮部詳議以聞賜言朱制謁孔子服靴袍再拜 上曰見先師
禮不可簡必服皮弁行四拜禮於是進視學儀注卽洪武中所

定也。上親行釋菜禮。命吏部尚書蹇義、戶部尚書夏原吉、翰林院學士解縉祭酒、胡儼分獻。十哲兩廡畢。上御彝倫堂。命坐講祭酒胡儼講尚書堯典。司業張智講易泰卦。大臣及翰林院詞臣皆賜坐。上諭之曰：「六經聖人之道，彌綸天地，昭揭日月，垂憲萬世。率由彝訓，與卿等皆勉之。」遂命光祿寺賜百官茶。次早祭酒胡儼等上表及箋稱謝。賜祭酒以下宴於奉天門監生宴於丹墀。仍賜儼及司業張智紵絲羅衣各一襲。學官王峻用等三十五人紵絲衣一襲。監生朱縉等三千七十四人鈔各五錠。時禮部會試舉人中式者縉第一。故縉爲諸生班首。云十二日廷試。命賜掌其事取林環以下進士及第出身有

差五年三月癸酉 命賜等選監生胡敬蔣禮等三十八人隸翰林院習譯書人月給米一石遇開科令就試仍譯所作文字合格准出身置館於長安右門之外處之以四夷字學分爲四齋令都指揮李賢以錦衣衛軍守門務令成業六年賜爲侍郎趙珰所間憂鬱感疾勉強奉職如平時忽以卒告 上疑其自盡召翰林諸臣問之衆未及對楊士奇進曰臣觀賜病數日但未敢卽安昨晚同立左順門下賜忽仆地傍人怪賜無人氣臣遽命其屬官掖出午門外 上聞士奇言曰微汝言幾誤疑賜賜本君子顧才不足耳命工部與棺禮部徃祭之後贈太子少師謚文安

趙珰字雲翰河南開封府祥符縣人洪武丁卯由郡薦入太學
士被命董事山東以廉謹授襲衣楮幣之賜歲庚午授兵部職
方司主事命覈天下兵馬暨諸路屯戍補其缺而增所宜置悉
得其實具圖以進 太祖以爲能乙亥陞武庫員外慎密小心
尤爲當道者所重戊寅陞浙江右叅政剗繁治劇事無凝滯時
海寇出沒劫取人財乃以計捕之境内獲安尋丁外艱吏民痛
之如離父母壬午年 成祖嗣臨大寶以能專對命使南交趾
至則誕宣德音恩威兼布夷長款服旣歸却其金寶之餽 上
聞而嘉之賜資優渥擢刑部右侍郎永樂二年轉工部再轉禮
部受命往封西寧侯朱晟歸五年冬拜禮部尚書賜宴於華葢

殿并徹御筵饌羞遺其母以榮之戊子 仁孝皇后崩逝命詣
北京卜山陵告成膺楮幣之賜壬辰督創隆慶保安永寧諸郡
治撫輯有方而新集之民悉安其業不知其勞七年扈行在秦
言北京國子監開設七年矣監生唐謙等情願出仕吏部試之
皆未通經宜罪司業趙季通 上曰姑宥之行文申明天下凡
弟子員再試不知文理者併罪其師發煙瘴地面安置十五年
改兵部尚書歷刑部尚書致仕許南京刑部

劉觀字

直隸保定府雄縣人洪武乙丑進士授大谷縣丞

有治才以薦舉擢監察御史三十年命署都察院左僉都御史
革除二年調嘉興府知府尊禮賢士修學政興利去害郡中肅

然尋丁父憂永樂元年起復擢雲南按察使未行拜戶部右侍郎二年調都察院左副都御史時左都陳瑛尚刻右都吳中尚寬觀善處二人各無阻忤四年肇建北京宮殿諸役並興命採木浙江旣至飭有司率吏民歷山谿險絕之地凡材之美者悉取之輸北六年陞禮部尚書尋以典章故實非其所諳改刑部尚書詳都察院

國朝列卿紀卷之三十九終